

LIGJ
Nr.9889, datë 20.3.2008

**PËR PËRCAKTIMIN E FORMËS DHE TË STRUKTURËS SË FORMULËS SË
PRIVATIZIMIT TË SHOQËRISË ANONIME “OPERATORI I SISTEMIT TË
SHPËRNDARJES”**

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Neni 1

Objekti

Objekti i këtij ligji është të përcaktojë formën dhe formulën e privatizimit të shoqërisë anonime “Operatori i Sistemit të Shpërndarjes”, në vijim OSSH, sha.

Neni 2

Forma e privatizimit

Privatizimi i OSSH, sha-së realizohet nëpërmjet transferimit të aksioneve, të zotëruara nga shteti, si aksione të kapitalit të shoqërisë, një investitori strategjik, me procedurën “Tender i hapur ndërkombëtar”, sipas formulës së privatizimit, të parashikuar në këtë ligj.

Neni 3

Formula e privatizimit

Forma dhe formula e privatizimit të aksioneve të OSSH, sha-së janë si më poshtë:

1. Jo më pak se 51 për qind, por jo më shumë se 76 për qind e aksioneve të kapitalit u ofrohen investitorëve strategjikë, të cilët janë shoqëri apo bashkim shoqërish, që zotërojnë garanci të nevojshme financiare dhe janë të specializuara në sektorin e energjisë. Paketa e aksioneve të parashikuara në paragrafin e mësipërm transferohet nëpërmjet shitjes, me procedurën “Tender i hapur ndërkombëtar”. Çmimi i blerjes paguhet në euro. Madhësia e kësaj pakete përcaktohet me vendim të Këshillit të Ministrave.

2. Paketa e mbetur e aksioneve të kapitalit të shoqërisë anonime “Operatori i Sistemit të Shpërndarjes”, të zotëruara nga shteti, u ofrohet subjekteve të mëposhtme:

a) ish-subjekteve të shpronësuara të truallit dhe të ndërtesave, në vlerë të barabartë me vlerën e truallit dhe/apo ndërtesave, të vlerësuara në përputhje me kuadrin ligjor në fuqi, për kriteret e vlerësimit të pronës shtetërore që privatizohet;

b) punonjësve të OSSH, sha-së, në shkëmbim të aksioneve me bonot e privatizimit apo letrat me vlerë për të persekutuarit, të zotëruara prej tyre, përfshirë edhe ato të zotëruara nga prindërit, bashkëshorti/ja dhe fëmijët e punonjësve.

Në rast se përqindja e aksioneve të kapitalit të shoqërisë anonime “Operatori i Sistemit të Shpërndarjes” nuk është e mjaftueshme për të kompensuar ish-subjektet e shpronësuara të truallit dhe të ndërtesave, ngarkohet Këshilli i Ministrave për të përcaktuar mënyrën e kompensimit të tyre.

Përqindja, mënyra dhe koha e transferimit të aksioneve, që do t'u ofrohen ish-subjekteve të shpronësuara dhe punonjësve, sipas pikës 2 të këtij neni, përcaktohen me vendim të Këshillit të Ministrave.

3. Për qëllim të shkronjës “b” të pikës 2 të këtij neni, punonjës të shoqërisë vlerësohen punonjësit, që punojnë në OSSH, sha pas përfundimit të privatizimit dhe/ose që pas vitit 1992 kanë

punuar për të paktën 5 vite për KESH, sha-në dhe/ose për OSSH, sha-në, apo për ndonjërin nga filialet e tyre ose kanë qenë anëtarë të organeve drejtuese të KESH, sha-së apo OSSH, sha-së.

4. Investitorët strategjikë, të cilët kanë blerë aksionet, sipas pikës 1 të këtij neni, ushtrojnë të drejtën e parablerjes së aksioneve të mbetura të OSSH, sha-së, të cilat nuk u janë transferuar ish-subjekteve të shpronësuar të truallit dhe/apo të ndërtesave dhe punonjësve të OSSH, sha-së, sipas pikës 2 të këtij neni, duke paguar të njëjtin çmim për aksion, sipas kontratës së shitjes. E drejta e parablerjes shuhet 1 vit pas përfundimit të procedurës së transferimit të aksioneve, që u janë ofruar subjekteve, sipas pikës 2 të këtij neni.

5. Pas përfundimit të periudhës së të drejtës së parablerjes, aksionet e mbetura të pablera nga investitorët strategjikë mbeten në pronësi të Ministrisë së Ekonomisë, Tregtisë dhe Energjetikës, që përfaqëson shtetin. Mënyra e transferimit dhe subjektet, të cilëve do t'u transferohen këto aksione, përcaktohen me vendim të Këshillit të Ministrave.

Në kuptim të këtij paragrafi, nuk zbatohen nenet 206 e 207 të ligjit nr.7638, datë 19.11.1992 "Për shoqëritë tregtare".

Neni 4

Programi i punonjësve të ristrukturuar nga privatizimi

Trajtimi i punonjësve, që do të dalin të papunë nga procesi i ristrukturimit, në kuadër të privatizimit të OSSH, sha-së, si dhe burimet financiare, të nevojshme për kompensimin financiar të tyre, përcaktohen me vendim të Këshillit të Ministrave.

Neni 5

Përdorimi i të ardhurave nga privatizimi

1. Të ardhurat nga privatizimi i OSSH, sha-së do të përdoren për:

a) mbulimin e shpenzimeve për organizimin e procedurave të tenderit dhe për veprimtari të tjera, që nevojiten në procesin e privatizimit;

b) pagesën e tarifës së suksesit shoqërisë së pavarur konsulente, të kontraktuar nga Ministria e Ekonomisë, Tregtisë dhe Energjetikës;

c) shpërblimin e komisionit të vlerësimit të ofertave të Komitetit të Konsulencës dhe Transparencës, si dhe të grupit të negocimit, sipas përcaktimeve të Këshillit të Ministrave;

ç) trajtimin e punonjësve, që do të dalin të papunë nga procesi i ristrukturimit të OSSH, sha-së, në kuadër të privatizimit të saj.

Pjesa e mbetur kalon në Buxhetin e Shtetit.

2. Masa e përdorimit të të ardhurave nga privatizimi i OSSH, sha-së përcaktohet me vendim të Këshillit të Ministrave.

Neni 6

Miratimi i kontratës

Kontrata për shitjen e aksioneve nënshkruhet nga ministri përgjegjës për ekonominë dhe miratohet nga Kuvendi.

Neni 7

Procedurat e përzgjedhjes së investitorit strategjik

Kriteret e përzgjedhjes së investitorëve strategjikë dhe kriteret e vlerësimit të ofertave për privatizimin e OSSH, sha-së përcaktohen me vendim të Këshillit të Ministrave.

Neni 8

Institucioni përgjegjës për procesin e privatizimit

Ngarkohet Ministria e Ekonomisë, Tregtisë dhe Energjetikës, me asistencën e shoqërisë

konsulente, për organizimin dhe kryerjen e procesit të privatizimit të OSSH, sha-së, në përputhje me kërkesat e këtij ligji.

Neni 9

Nxjerrja e akteve nënligjore

Ngarkohet Këshilli i Ministrave që, sipas përcaktimeve të neneve 3, 4, 5 e 7 të këtij ligji, të nxjerrë aktet e nevojshme nënligjore për realizimin e procesit të privatizimit të OSSH, sha-së.

Neni 10

Legjislacioni i përjashtuar

Ky ligj përjashton zbatimin e akteve ligjore të mëposhtme:

- a) të ligjit nr.8006, datë 5.10.1995 “Për miratimin e formulës së mbajtjes së aksioneve në çastin e shitjes së shoqërive, që veprojnë në sektorin e energjisë elektrike”;
- b) të ligjit nr.7963, datë 13.7.1995 “Për privatizimin e sektorit të energjisë elektrike”.

Neni 11

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

**Shpallur me dekretin nr.5678, datë 31.3.2008 të Presidentit të Republikës së Shqipërisë,
Bamir Topi**